

Κα γο τελααη βεε ε

Ceci est un conte

Contes en langue « samogho » jɔ



Telaan̄ kiri kilamaan̄ ki

1. Bεε	1
2. Yerinḡ bi ki	3
3. Deŋ fa biŋ ni	6
4. Kwulu fa sufaniŋ	8
5. Kwulu fa ŋaannaan̄ ni	10
6. Kwuu jɔnpɔnitin̄	12
7. Juubi	15
8. Daŋ kilabali fuuli	18
9. Kwuu fa fɔŋŋ	20

Ka yɔ telaan̄ bεε

Ceci est un conte

Un livre de contes en langue « samogho » jɔ

Fournis par Bamoussa Ouattara,
transcrits par Mama Djilla

JOKAYIJE / SIL-Mali



« *Ka yɔ tɛlaaŋ bɛɛ* » en langue « samogho » jɔ est produit par l'équipe jɔ à Koura. Les contes et fables ont été fournis par Bamoussa Ouattara, ressortissant de ce même village. L'orthographe utilisée est celle révisée de 2020 et est en accord avec l'alphabet national du Mali et l'alphabet agréé par la Commission Nationale des Langues Burkinabè.

2^{ème} édition, orthographe révisée 2020

1^{ère} impression, septembre 2021

50 exemplaires

© JOKAYIJE / SIL Mali

Site web: www.jobira.org

B.P. 2232 Bamako, République du Mali

Tous droits de traduction, de reproduction et d'adaptation sont réservés pour tous pays.

Toutes les contestations relatives à l'application des dispositions de la présente ordonnance, fixant le régime de la propriété littéraire et artistique (No 77-46 CMLN, du 12 juillet 1977) seront portées devant les tribunaux civils, sans préjudice du droit pour la partie lésée de se pourvoir devant la juridiction répressive dans les termes du droit commun.

cɛfan, nì i bili fɔŋ cɛfan, fɔŋ i ta bili tunpa
jiring na. Kwuu so fɔŋ kila-i kì.

Kabi niŋ shikaŋ, kwuu so leŋ fyɛka ra kili kì. Niŋ
ki ncin-i kwuu fa fɔŋ i fu-a kì.

9 Kwuu fa fɔŋŋ

Ka yɔ telaanɔ bɛɛ ɛ.

Kwuu fa fɔŋŋ, yìrì wuru wɔshurutinɔ ni i. Kwuu i so-ri leɔ fyɛka ra, fɔŋŋ duminɔ so-a ninɔ na kì.

Ninɔ jaannajuubi ki i ji fɔŋŋ tɛ.

Jibi bɛɛ, fɔŋŋ i ta fa kwuu wu awɔ leɔ fyɛ-a. Fɔŋŋ tu kwuu tɛ, tu : « A minɔ ji wuru-ra n'tu, mìnɔ i n'ɓɛɛ bo minɔ tɔŋŋ ki sun, minɔ leɔ fyɛ wulu ki wuru-ra ta-ri gbiila. » Kwuu tu n'ɓɛɛ ra so bo-i afinɔ tɔŋŋ ki sun dɔɔkunɔ? Fɔŋŋ tu afinɔ a so n'ɓɛɛ ragberi bo-i n'sun. Kwuu fani i a tɔŋŋ po fɔŋŋ tɛ. Fɔŋŋ i kwuu tɔŋŋ gberi, fɔŋŋ nì i na n'bo kwuu tɔɔnta ra. Kwuu tu a ra leɔ fyɛ, nì i po wo wo wo, wo wo. Kwuu so leɔ fyɛ-i kì. Kwuu tɔŋŋ i kwulu fɔŋŋ cɛfan. Kwuu tu fɔŋŋ a tɔŋŋ ki myɛ a jaan ki tɛ nmanɔ, tu a ninɔ ji-i kì, tu afinɔ a fɔŋŋ taa. Fɔŋŋ i bili ta cii yali, nì i ta jishi ceeli. A fɔŋŋ kwuu tɔŋŋ ki bu mani wɔ ru, a nì n'bi tu a ra jishi ki de n'nu, nì i gberi-ra, fɔŋŋ i n'ma ninɔ jaan ki tɛ, fɔŋŋ i ta yeli, kwuu tɔŋŋ ki so myɛ-i kì. Fɔŋŋ ciiru kwulukɔni i bili jɔɔkɔ, kwuu i bili fɔŋŋ

1 Bɛɛ

Ka yɔ telaanɔ bɛɛ ɛ.

Wenɔ bɛɛ fa awɔ mari. Bɛɛ bo wuru kí sun. Cɔn i ji wuru wenɔ ki gbɛ. A si ki sari-ri, wú wuru cɔn ki bɛɛ shi-a, nwɔ a koɔ tenɔ pyii, wú i n'wɔri mari ki tɛ, wú i tiri jaɔ ki ru. A mari ki cɔn ki boturu, nmari i na-a n'wu wú cɛfan. A nmari na n'wulu bi wú tɛ, wenɔ ki i ta-a so shii ki fɛ, wú i sɔɔ. Mari ki i cɔn ki shi sɔɔ-ra wú fɛ. A cɔn ki sɔɔ wú fɛ, wú i n'bi-a tu nmari ncusun, a i n'shɛɛli, tu nì a ji shɔ woo. Ninɔ jaan ki tɛ, a wú cɔn wɔ shi, wú i ninɔ nuyali-la, tu ninɔ shɔ kì, wú i ninɔ kee-ra. Wú i cɔn ki bataa ruyali kee-ra ninɔ jaan ki tɛ, tu yìrì shɔ kì. A mari ki bɛɛkɔni ki tiri kulu waarinɔ wɔ ru, wenɔ ki yɔ kila-a, wú i ta cɔn ki bataa shi, wú i na sɔɔ, wú i n'nu. Ninkunɔ faratata, wú i mìnɔ bi tenɔ ki ma-ni. Wúfinɔ i gbɛ-ri, mari ki i kɔnkɔ-ri jibi woo jibi.

Jibi bɛɛ, mari cɛɛnni bɛɛ i na nmari ranɔri tu:
« N'danmari, nfenɔ ma-a minɔ wu? Minɔ i kɔnkɔ

tiri-ri kɔɔn. Miŋ nufiŋ kila-a kɪ wa? » Nmari tu:
« Cɔn banteni yɔ yibɛɛ gbɛ. A mɪŋ ja ji cɔn ki
boturu, ŋɪ i tiri nɛ'wu nɛ'wɔ shuru ki cɛfan, wú yɔ
ta-a nɛ'bataa ruyali kee, tu yìrì shɔ kɪ, tu yìrì ra so
nu-i kɪ. Mɪŋ bɛɛkɔni ki i na-a kulu jibi woo jibi. »
Mari cɛɛni ki tu nmari tɛ : « A miŋ ta siri wɔ ki
wu, a wú ja ta nɛ'ma mɪŋ naan tenŋ ki tɛ, ŋi i
jɔɔkɔ, ŋi i ta yìrì rakɔli, ŋi i yìrì nu. »

Si ki sari-i, mari ki i niŋ shikaŋ cɔn ki maan,
nmari ta-i so. Weŋ ki i nɛ'ma mɪŋ naan tenŋ ki tɛ.
Mari ki i jɔɔkɔ, tu a ra ta yìrì rakɔli, a i na yìrì
nu. Weŋ ki i bili jɔɔkɔ, wú i ta yìrì bataa rakɔli
san nmari jɛŋ, wú i na yìrì bo. Kɪ i niŋ shikaŋ wɔ
ki nu arɪmaŋ fan. Kabi niŋ shikaŋ, weŋ ki niŋ
bishi ma awɔ mari ki wu kili kɪ.
Jaa bɛɛ narinbi tɔ-a kɪ!

kɪ i ta peli ki ra. Kɪ i ta fa konaŋ ki wu nmaŋ.
Pelitiŋ ki i fiŋŋ kiri yɛɛrateri-ri. Ntiŋ i fiŋŋ kiri
yɛɛrateri-ra mɪŋ naan wɔ tɛ, ntiŋ i yìrì
yɛɛrateri-ra mɪŋ naan ki tɛ. Kwuu kiri fa naan
kiri, fa saa kiri, naŋ kiri yeri wulu bi-a ki sa!
A nwɔtiŋ a kpaan, nintiŋ i awɔ wulubi-a awɔ fiŋŋ
sun, ntiŋ i nɛ'wɔri, kɪ i niŋ kilɛn. Ninkunŋ faratata,
fɔ ŋi i ta so ka jimari fuuli ka sun. Niŋ i fa pwaŋ
ki, niŋ na-i awɔ naan ki wu, niŋ i awɔ naan ki
wɔri, kɪ i niŋ yɛɛrateri. Naamari ki kɔniŋ i sɛɛsɛri
tiri-ra awɔ daŋ ki wu a gbɛɛra. Nɛ'so-i nɪŋ sun, nɪŋ
i daŋ ki ye kɪ gbɛɛra, nɪŋ i a bo yaalinpo sun, kɪ tu
nɛ'ma ji? Nɪŋ tu a fiŋŋ nɛ'bi-ri tu a fiŋŋ na daŋ kila,
tu a fiŋŋ a na nɛ'wɔri peli ki tɛ. Koŋ fɔn i ta tu nɪŋ
shɛɛli-la. Pelitiŋ ki nɛ'ja-i, nɪŋ i daŋ ki gbenanŋ fuuli
rateri, kɪ i nini cunŋ ki bo peli ki sun. Kɪ tu nɪŋ
tɛ : « Miŋ nwɔ ma-i kaa, koŋ nɛ'ma-a kɪ. Miŋ yɔ
fiŋŋ ki cɛfan, a miŋ nɛ'bi tu miŋ a na ninki wɔri, ŋi i
tu nfiŋŋ wu gbɛ? »
Ninki koŋ gbenankɛsɛɛraaŋ ki fa gbenankuma ki
bwunu san-i gbenanŋ pyɛ kiri fɛ kaa.

8 Dan kilabali fuuli

Ka yɔ telaan bɛɛ ɛ.

Jimari fuuli, kí fɔn cɛn wɔri wuru arɔɔ shuru ri tɛ kɔ. Kí cɛn kiri i ta so jiri jɔnpɔni ni sun, kí tɔri dan kila kì. Niɲ shikanɲ, kí koɲ fuuli ki fɔn i na, arì na-a po kulu. Kí na-i po kulu ki ra, jibi bɛɛ, kí koɲ fuuli ki i na tu bari ki ra, kí tɔnɲ i ta so arɔɔ dan bi ki sun. Naamari ki tu a pwanɲ ki tɛ, tu : « Yi ta yi tɔnɲ ye pɛli la. » Kí i po nandanbulu sun, n̄'sisarifuluntɔnɲ, kí i ta arì tɔnɲ ye pɛli bɛɛ ra arɔɔ kili ki ra nmanɲ. Naamari ki tu pɛli ki tɛ : « A miɲ so míɲ ka-i dan na, míɲ a na dan ki wɔri miɲ tɛ. » Pwanɲ ki tu : « A miɲ so míɲ ka-i dan na, míɲ a na naan wɔri miɲ tɛ. » Pɛlitiɲ ki tu kí tɛ : « Ábɛɛ wulu wɔri bi-i kaa, yìrì so-i ábɛɛ ciiru wa? » Kí tu : « Yìrì so-i yibɛɛ ciiru dɛ! Dan bi ki yibɛɛ yeli-i gbɛ wɔ sun, yibɛɛ yɔ n̄'tɔ-a nmanɲ. » Kí i arì pwulu. Kí tiri shikanɲ so-i, kí i saa rafɛ, kí i tiri. Kirinɲ fani i ta bili kí sun, kí i dan ni kila, danshuru ri. Kí fɔn ciiru i di. Jibi bɛɛ, kí i cinɲ bo arìmanɲ tɛ, tu arì ta arɔɔ tɔnyefinɲ kiri wɔri. Kí i na sa! Kí i na san. Si ki sari-i,

2 Yering bi ki

Ka yɔ telaan bɛɛ ɛ.

Wɛɲ bɛɛ, wúwɔ yering bi juu wuru haali. Wú wuru a maanni de-a. A wú juta wɔ manɲ tɔ, wú i ta-a niɲ saa, wú i niɲ yering kiri bataa pa. Wú tu-i niɲ na faratata, jibi bɛɛ, wú i na ta juta bɛɛ manɲ tɔ. Wú i ta bo niɲ juta ki sun, wú i n̄'saa, wú i n̄'saa, wú i ju ki saa kɔ. Wú yering teennaanɲ kila n̄'nu kì, fɔ yering dan kusukulu tenɲ. n̄juniɲ i n̄'na kì, jinɲ i n̄'na kì. Wú i yering ki shi, wú i n̄'shɛeli faratata, wú i n̄'bo a kelinɲ na, wú i pɛri ki rufɛ sɛbɛ. Wú finɲ tɔri ja kì. Wú po-i, wú tu a ra tiri, a i yering ki tu nmanɲ. Yering ki tu, wú na a shi, tu wúfinɲ ju ki saa san afinɲ sun naan wɔ tɛ, tu wúfinɲ a ta afinɲ taa mìnɲ naan ki tɛ. Tu a wúfinɲ yeri afinɲ taa woo, tu wú a taa ki woo, tu wú a beeni. A wúfinɲ ja ji afinɲ kankanɲ ki taa, kankanɲ yaa ra wúfinɲ kilen. A wúfinɲ ja ji afinɲ n̄juniɲ ki taa, n̄juniɲ yaa ra wúfinɲ kilen. Wɛɲ ki gbɛeratɛɛkɔni i na yering ki wu kulu.

Wú tu a ra ta tuu rakili a niṅ ki wɔ̄ keli ki ru, wú niṅ ki i wú kalikali ñ'wu. Wú ñ'ja kì, wú i ta tuu ki rakili taanna. Wú i awɔ̄ yering ki ruteriteri, wú i ñ'kani. Ñ'maan mani wɔ̄ ru, wú i ñ'taa. Wú ñ'taa kɔ̄-i, jumwunu i kwulu wú ra. Wú i ta de a niṅ ki wɔ̄ keli ki ru, wú i nmari wɔ̄ je ru ju ki bataa mwunu. Niṅ i wú pyii kì, wú i ta suta ru ju ki bataa mwunu. Wú i kila, wú i tunpa sɔ̄ jiring sinan bɛɛ ru.

Kabi niṅ ma-i, ju bi ki i furu mani ki bataa ru.

Koṅ fɔ̄n i ju ki ceeli-li. Niṅ shikan, deṅ fa kwulu i po, tu arì ta arì maanni sunu su ki fan. Yìrì i ta arì maanni su ki fan faratata. Yìrì i ba, yìrì i ta po bo weṅ ki sɔ̄man ki sun. Deṅ i ju ja tɔ̄li-la.

Deṅ tu kwulu tɛ : « Ñ'wɔ̄ wɔ̄shuru, na sini kan, ju i tɔ̄li-la kan » Kwulu i na. Yìrì i arɔ̄ fɔ̄rɔ̄nkɔ̄ kiri sɔ̄ ñ'fɛ. Fɔ̄rɔ̄nkɔ̄ kiri i faa. Yìrì i arì pwulu. Deṅ tu a ñ'so siri, yi i na kan sɛbɛ. Yìrì ta-i niṅ na, kwulu i ta awɔ̄ ju ki rupwulu, ṅi i a pwulu, tu a ra na deṅ cini kwun. Kwulu ta-i so, ṅi i awɔ̄ fɔ̄rɔ̄nkɔ̄ ki sɔ̄, kwunṅ ciiru fili kì. Kwulu i kɔ̄rɔ̄tɔ̄ ju ki ra, ṅi i

nman kì. Míṅ fani ñ'ja kì, míṅ i ka nɔ̄ nbaa ju ka rafe kaa, ṅi i ñ'mwunu, ṅi i siriju shi ñ'bɛɛ ra, ṅi i ñ'siri, ṅi i kila, ṅi i ñ'bɛɛ shi bo bɔ̄ling ki ru, niṅ ki i kaa. » Weṅ ki i a ṅuniṅ nuti, jaa, wúfinṅ niṅ ki ka baara ka ma-i. Weṅ na-i so a niṅ ki sun mani wɔ̄ ru, wú niṅ i bili de keli lu, nmari i ta ju shi na wú tɛ. Weṅ a ṅununafifa. Tu kí ta ka ju ka bo nman, tu kí i ta nɔ̄ ju ki bɛɛ shi na a tɛ. Nmari tu niṅ i ji nfenṅ ma wɔ̄? Wú tu « Aa ! Ábɛɛ ju wɔ̄ bishi shi wɔ̄ri-i je saa fwuudetɔ̄nṅ ki tɛ de, míṅ a niṅ ki bɛɛ mwunu. Ábɛɛ ñ'wɔ̄ri-i nwɔ̄tinṅ tɛ kaa, mari ki bɛɛ dan ye. Ábɛɛ ñ'wɔ̄ri-i wú tɛ, míṅ jumwunu kɔ̄ni ki fa wú fu-i. Míṅ fani i niṅ ki bɛɛ rafe wú gbɛ, ṅi i ñ'mwunu. Niṅ ki ra, a ábɛɛ ji ñ'tɔ̄ -a tu koṅ wɔ̄ shɔ̄ring mamaan ki fa ñ'wɔ̄ je mamaan ki bataa ta-a po-ri n'dan ni tɛ wa? A ábɛɛ áwɔ̄ baara ji sɔ̄n je bi konan dan ni sun, ñ'bataa ra ta po míṅ nu sɛbɛ. » Weṅ niṅ bi-i mani wɔ̄ ru, wú niṅ ki i ta a ṅuniṅ sunsan tu jaankwunṅ ki ra.

Niṅ na, tu yi shɔ̄ring ma-ni sabu Kiring i so-a bi bataa ra.

nɔɔ nbaa ju ki wulu ye. Nmari tu : « Hɔn, a n’ji-a so n’mwunu-i, ɲi i n’mwunu-na ke! » Wenj ki i nɔɔ nbaa ju ki shi, wú i n’mwunu. Wú tu : « ɲí a so n’bɛɛ bo-i n’wɔ bɔlinɲ ki ru wa? » Nmari tu : « Hɔn, n’bɛɛ bo n’nu ke! » Wenj i awɔ bɔlinɲ faa, wú tu : « Yi a ji faa! » Wú tirimaan ki, mari ki nwɔ bi-i wú cini, tu : « Miɲ a miɲ nɔɔ ju ka mwunu, koɲ n’bi kì, jufaamaɲ nari bo-i kɔɔn, miɲ i ta-a yiri ka sunɲ kwulu ka ra, n’tu ɲi a n’mwunu, ɲi a cin, ɲi i niɲ ju jii ki kila. Ngban-ni n’jɛɲ nmaɲ. »

Wenj i tiri faratata, fɔ jaɲ gbɛ bɛɛ fanimwunɲ, wú fa wenj bɛɛ i fu niɲ mani, niɲ fani dari furu wuru jumwunu ki ra sɛbɛ. Wú fa niɲ i arìmaɲ co, coolinɲ ki kɔɔtɛ, niɲ tu wú tɛ : « Míɲ a ju kila n’gbɛ wa? » Wú tu : « Aa! Ju wɔ kɔniɲ i míɲ gbɛ kaɲ, niɲ i kaa dɛ! » Niɲ wenj i niɲ ju ki mwu. Wú i a mwunu. Wú a mwunu kɔ-i mani wɔ ru, wú tu : « Nkenɲ ka ju ka wɔri miɲ tɛ sa? » Ka ki tu : « Míɲ fwuude-i bwɔ bɛɛ ra kenɲ, míɲ ju rafɛ-i mari bɛɛ gbɛ, nmari i a kaan ju wɔri míɲ tɛ, tu ju

ta bali ceeli, ɲì i n’nafeni. ɲì i n’bu wenj ki ciiru. Niɲ ma-i mani wɔ ru, ju ki bataa i pwulu jeri kwulu sun. ɲì i kwulu fa awɔ fɔrɔnkɔ ki wulu tiri. Kwulu i beeni. Ju ki i na su ki faa a jaan ki tɛ nmaɲ.

Ka yɔ tɛlaaŋ bɛɛ ɛ.

Deŋ fa biŋ ni n̄'bi wuru tu arìmaŋ boturu jɔŋŋ tan. Tu n̄'bɛɛ de sɔɔ duŋ ki ru, tu duŋ ki i tɔŋŋ nala nintɪŋ sun. A duŋ ki sɔɔ tuu ki sun, a duŋ nutɔŋŋ ki ja ji wee wee bi, tu arì i nintɪŋ po. Deŋ tu ñi a tɔŋpa afin sun. Biŋ ni i jɔrɔkɔ, yìrì i deŋ de duŋ ki ru. Yìrì i duŋ ki sɔɔ tuu ki sun, yìrì i peekuŋ sɔɔ duŋ ki tɔŋŋ na.

Waarinŋ bɛɛ so-i, deŋ i wee wee bi, biŋ ni i wú po. Wú tu biŋ ki bɛɛ de duŋ ki ru, tu n̄'pyɛ kiri i tiri. Biŋ ki bɛɛ de-i duŋ ki ru waarinŋ wè ru, n̄'pyɛ kiri i tiri. Deŋ i peekuŋ ki sɔɔ biŋ ki tɔŋŋ na, wú i ta faa ceeli, wú i na niŋ sɔɔ peekuŋ ki sun. Niŋ ŋaan ki tɛ, wú i faademaŋ kiri rala.

Waarinŋ bɛɛ so-i, biŋ tu wee wee. Biŋ wee wee bi-i, deŋ tu wúfinŋ wulubi-i sun kì. Wú tu afinŋ a wúfinŋ taa. Wú i ta n̄'bɛɛ bo suu ki sun sɛbɛ. Niŋ ŋaan ki tɛ, biŋ i beeni.

Ka yɔ tɛlaaŋ bɛɛ ɛ.

Mari bɛɛ, nmari juu wuru-i, fɔ ñi i ta so a daŋ ki ra. Koŋ ka di-ri nmari tɛ kì. Nmari fa awɔ shuru ki koŋ fuuli wuru arɔɔ bwɔ ra. Á n̄'tɔ tu fɔɔfɔɔ, mani kiri nari wuru arìmaŋ na. Kóó bwɔ ki fani i ji wuru saatɔŋŋ na. Danshuru cɛɛnni tenŋ wuru nmari gbɛ. Niŋ fani i ji ta-ri a maannimaŋ nu. Jibi bɛɛ, weŋ bɛɛ saa fwuudera i na po bo bwɔ ka ra, mari ka sun. Niŋ i fa, nmari wɔ shuru ki nmaŋ kì. Weŋ ki i coolintan, nmari i n̄'nama. Wú tu nmari ju wɔri a tɛ, a ra a mwunu. Niŋ i fa, nmari wuru nɔɔ nbaa-ra.

Niŋ nɔɔ ju ki sɔɔ-ɔ ji nmari kelina, nmari tu weŋ ki tɛ : « Ju míŋ gbɛ kaŋ kì de! » Weŋ ki tu : « Ju mwɔɔnna wulu i kì ji, mwunu wɔ batenŋ yɛ. » Nmari tu wú tɛ : « Hali niŋ yeri míŋ gbɛ kaŋ kì. » Niŋ i fa, weŋ ki dari ki fɔn furu-i jumwunu ki ra kɔ. Wú ŋaan ja n̄'na kì, wú tu : « Nwè sɔɔ-ɔ miŋ kelina kaa, koŋ niŋ mwunu-na kì wa? » Niŋ i fa,

konaŋ ki kanfe, ntiŋ i a maanni ta faratata, ntiŋ ta-i so mari ka wɔ shuru ki sun, ntiŋ tu kilitiŋ ki te : « Míŋ koŋ sɔŋ je ki beɛ ja-i kwumaŋ de! » Kilitiŋ ki tu : « Hɔn, Míŋ kɔniŋ koŋ tɔ san-a koŋ nu kɪ de! A nwɔ̀ ji miŋ gbɛ, niŋ ma ke! » Je ki i awɔ sɛniŋ ki cɛen po, ntiŋ i tu weŋ ki sun faanna tu : haababa, haababa, haababa! Weŋ i yaalinpo, wú i n'po, ntiŋ a maanni sebe, ntiŋ i na tu wú ŋununu sebe, ntiŋ tu : « Kilitiŋ, míŋ koŋ tɔri ja miŋ koŋ tenŋ ka fan kɪ de! » Kilitiŋ ki tu : « Hɔn, a nwɔ̀ ji miŋ gbɛ, niŋ ma ke! » Ntiŋ i tu weŋ ki sun sebe : haababa, haababa, haababa! Weŋ a pwulu awɔ yaalinŋ sun sebe, wú i n'nukaan. Niŋ ma-i, je ki i saa rafe, konaŋ ki i pyɛ. Weŋ na-i so awɔ mani nu, wúwɔ mari ki i bili po tu : « Hɔn, míŋ i ji-a n'bi-a miŋ te, n'tu a n'beɛ san n'yɛri ra, miŋ n'tɔ-a tu míŋ bi-a kɪ, miŋ n'ja jiŋ kɪ wa? Ka konaŋ jiiteɛ ka ru, kí i ta miŋ tenŋ bwɔ ka ŋaan ka te! » Kabi niŋ ma-i, weŋ i awɔ kwuu kiri bataa kilɛn kee, wú i mari ki paka shɔ sa.

Deŋ i biŋ taa. Wú tu-i niŋ na faratata, wú i biŋ kiri sunneɛn taa-ri. Doŋ i ji wuru wúfinŋ ja-a nmaŋ.

Jibi beɛ, deŋ mabi ki na-i doŋ tɔnfɔɔ, niŋ i a teli ta wú te. Wú niŋ ja-i, wú tu niŋ na arimaŋ boturu jɔntan. Niŋ i a tu. Deŋ tu ŋi a tɔnpa afinŋ sun. Niŋ ŋaan ki te, wú i deŋ de duŋ ki ru, doŋ i tuu ki rakili duŋ ki fe. Waarinŋ beɛ na-i so, wú tu wee wee. Doŋ tu wúfinŋ wulubi-i sun kɪ. Tu wúfinŋ biŋ kiri taa afinŋ ŋaanna miŋ ŋaan wɔ te, afinŋ a wúfinŋ taa miŋ ŋaan ki te. Niŋ ma-i, doŋ i deŋ taa. Deŋ wɔ biŋ taa fani i kɔ niŋ mani nu.

4 Kwulu fa sufaniŋ

Ka yɔ kwulu fa sufaniŋ i.

Sufaniŋ wuru tu-a ɲì i ta-ri awɔ nufiŋ nu-ni sibi ki ru jibi woo jibi. Jaa, kwulu yɔ sufaniŋ ja-a nmaŋ. Kwulu wuru ɲ'ɛ a i sufaniŋ taa, nka ɲ'wuru keni-na sufaniŋ jɛŋ. Niŋ shikaŋ, ɲì i a kpaan sufaniŋ ɛ, ɲì i na sufaniŋ nanɔri. ɲ'ɛ tu ɲ'ɛ, tu : « Miŋ siri i tu-a ɲi i na n'maanni-ni n'ciin sa kɔɔn kɛ! ». ɲ'ɛ tu : « Hɔn, fiŋ tɔri teennaanŋ miŋ fan kaŋ kì, kaashi miŋ na kì. A kpaliŋ bo miŋ sun, tu a ra miŋ taa, miŋ a ɲ'kari dɔɔkung? Mɔɔn kari ki tan-a n'maannate ra? » Niŋ bi-i sufaniŋ ɛ, sufaniŋ bilimaan i ji wuru-i. ɲì wulubi kì, ɲì i a ɲununafifa. ɲì niŋ ma-i, kwulu ɲakilila tu sufaniŋ na ji awɔ kari ki tan-a a ɲuniŋ na. Kwulu i a pwulu.

Bilana ki na-i so, mani ki i cianŋ tan.

Kwulu i a da na, ɲ'ta-i so sufaniŋ sun, ɲì sufaniŋ ja-i a sheeli-la, ɲì i a da tiri sufaniŋ kɔɔɛ, ɲ'ɛ tu a ra na ɲ'pa a kɔɔɛ kanŋ ki sun. ɲ'mye sufaniŋ ɛ mani wɔ ru, sufaniŋ i see, ɲì i a kanŋ fuuli ki sɔɔ,

Niŋ tu : « ɲ'danmari, nfenŋ ma-a miŋ wu ? Miŋ i kɔli-li kɔɔn. » Nmari i ɲ'ɲaanbi niŋ ɛ. Niŋ mari cɛɛnni ki tu afiŋ a ɲaan ceeli ɲ'na.

Jibi bɛɛ, mari cɛɛnni ki i shuru juuliŋ ni bo a sun, nmari i na jɛri kilitiŋ ki gbɛ jɛbira. Nmari tu kilitiŋ ki ɛ : « Míŋ yɔ sunŋ tenŋ jɛ ɛ. Míŋ san-a koŋ wɔ kili la kì. Míŋ yɔ ɲ'maanni de-a, ɲì i koŋ sɔŋ jɛ ri racin-ni. A koŋ sɔŋ jɛ ri ji n'gbɛ ɲ'kaŋ, ɲì a nini nacin, ɲì i tiri ɲ'jɛŋ. » Kilitiŋ ki tu : « Míŋ kɔniŋ yɔ kilitiŋ i, nka míŋ ɲ'wɔ kilidaŋ ni sɔŋ tɔ-a kì dɛ! A miŋ kɔniŋ ji koŋ sɔŋ jɛ kiri tɔ-a, míŋ a kilidaŋ ki bataa dɔri na, ɲi i na koŋ sɔŋ jɛ ki ceeli kí ru. » Jɛ ki tu niŋ a so ma-i. Niŋ i fa faantiŋ kiri wɔ koŋ bɔɔ suuliŋ ki bɛɛ yɔ jɛ ki wɔ jɛɛbi ki fɛ nmaŋ. Kilitiŋ ki i dɔri bo awɔ kilidaŋ ki bataa ɛ. Pyaanniŋ, konaŋ ki bataa i na arimaŋ kila kilitiŋ tɔntɔɔ ki tɔŋ na. Kilitiŋ ki i jɔɔkɔ tu: « Á á tɔɔnye ! Jɛ kɔniŋ na-i míŋ ɛ kaŋ, tu afiŋ koŋ sɔŋ jɛ ceeli-la, míŋ dumiŋ koŋ sɔŋ jɛ tɔ-a kì. Ntiŋ yeri ki a a maanni yi ru. A nwɔtiŋ ji koŋ sɔŋ jɛ daa, ntiŋ a nintiŋ nacin. » Jɛ ki i jɔɔkɔ de

6 Kwuu jɔnpɔnitɪŋ

Ka yɔ telaanɔ bɛɛ ɛ.

Wɛŋ bɛɛ, kwuu jɔnpɔni wuru wú gbɛ. Jiri bɛɛ fɛ, bɛɛ i na bo kí sun. A mari ki ku ki si, nwɔ̀ yɔ san po-a wɛŋ ki tɛ, jaa niŋ i wú pyii-ra kɪ. Niŋ shikanɔ, wú i na n̄'bi mari ki tɛ, tu : « Ku ki ja ji maan, sani ŋi i n̄'san, n̄'bi n̄'tɛ. » Ku ki na-i maan, mari ki tu wú tɛ, tu ku ki maan. Wú tu : « N̄'wɔ lu ki san sun. » Mari ki i niŋ san. « ŋumanke wɔ ku lu ki san. » Mari i niŋ san. « Sɔnbɛ anbɛɛla wɔ lu ki san. » Mari i niŋ san. « Kɔnɔtɛkuma wɔ lu ki san. » Niŋ i san. « Sinilɔ wɔ lu ki san. » Niŋ i san. « Mɔgɔmamɔgɔlɔ wɔ lu ki san. » Niŋ i san. « Bolitaanɔ wɔ lu ki san. » Nmari i niŋ san. Ka ku kari bataa so-i san kɔ sun, ku ki i kɔ san duŋ ki ru. Mari ki i kankanɪŋ ki kaan, nmari i niŋ taa. Niŋ jaan ki tɛ, a wɛŋ ki ja awɔ lu ki nu, a niŋ i wú pyii kɪ, wú i n̄'bɛɛ nu-a kwuu kiri wɔ lu ki ra, wú i a tɔŋŋ nafaa. Kí i tu ninkunɔ furututu, jibi bɛɛ, mari cɛɛnni bɛɛ i na mari ki dɔri de a tɛ.

ŋi i kwulu bwɔ, fɔ kwulu i ta fɛɛn a doŋ na. N̄'fɛɛn mani wɔ ru, ŋi i fɛɛn tu nman. N̄'janinsun na-i tu waarinɔ wɔ ru, ŋi i tiri kulu. N̄'ta-i cin, ŋi i a maanni yiri nman, ŋi i na so sufaniŋ sun, n̄'tu sufaniŋ tɛ : « Nfɛnɔ finɔ fi shinwulu wuru kaa kɔɔn, nfɛnɔ wuru miŋ pa-a? » Sufaniŋ tu afiniŋ n̄'fintiŋ kila faan na kɪ. Kwulu tu : « Eh, miŋ yeri ki n̄'kila faan na kɪ wa? Míŋ tu-i n̄'wɔ mani ki ru, fɔ tuu i ta ŋani míŋ jaanfɛ, miŋ i n̄'bi, tu miŋ n̄'kila faan na kɪ wa, miŋ wuru-ra n̄'kilɛn wa? »

Kabi niŋ ma-i, kwulu i keni sufaniŋ jɛŋ.

5 Kwulu fa jaannaanɗ ni

Ka yɔ telaanɗ bɛɛ ɛ.

Kwulu wuru ta-a awɔ yii san-ni jibi woo jibi.
Jibi bɛɛ, kwulu i na ta awɔ yii ki sanmanɗ ki ru, ɗi i ta jaannaanɗ ɗɔɔn ni ja. Kwulu yii ki san kɔ-i mani wɔ ru, kwulu i jaannaanɗ ɗɔɔn kiri rakɔli. ɗi i yiri bo awɔ yii ki fe sheerinɗ ki ru. ɗi i man kilen dan taanɗ ja, ɗi i nini yali, ɗi i yiri bo yii ki ɗununsun. Kwulu i kulunsaa pa.

Jaannaanɗ kiri na-i, yiri i na bɔli arɔ ɗɔɔn kiri cini, jaannaanɗ kiri i saa ki shi kwulu cɛfan. Yiri na-i kwulu kila mani wɔ ru, yiri i ta sɔɔ kwulu jɛɗ jirinɗ bɛɛ ru. Yiri tu kwulu tɛ, tu : « Miɗ yiri-ra da ? » Kwulu tu a finɗ i yiri-ra manɗ yalimanɗ nu. Yiri tu kwulu manɗ ki bɛɛ wɔri arɔ tɛ, arɔ n'neɛ. Kwulu i manɗ tenɗ po, ɗi i n'kee bo jaannaanɗ kiri tɛ. Jaannaanɗ kiri i niɗ manɗ ki gwu, yiri i niɗ nu kɔ. Yiri i mini sebe, yiri i ta sɔɔ kwulu jɛɗ, tu kwulu yiri-ra da?

N'tu a finɗ yiri-ra manɗ yalimanɗ nu. Yiri tu kwulu

manɗ tenɗ wɔri arɔ tɛ, arɔ ra n'neɛ. Kwulu tu yiri bɛɛ ra a fɔɔn manɗ ki kɔ wa? ɗi i tenɗ wɔri yiri tɛ, yiri i niɗ nu. Yiri i n'ma ninkunɗ faratata, manɗ ki i ta kɔ san kwulu gbɛ. Manɗ ki kɔ-i mani wɔ ru, yiri i mini sebe, yiri i na sɔɔ kwulu jɛɗ, tu kwulu yiri-ra da? Kwulu tu a yiri-ra manɗ yalimanɗ nu. Yiri tu ɗi manɗ tenɗ wɔri arɔ tɛ, arɔ ra n'neɛ. Manɗ ja kwulu gbɛ ki, jaannaanɗ kiri i jeri bo kwulu sun, yiri i kwulu fi, fɔ yiri i kwulu kilen, yiri i arɔ ɗɔɔn kiri shi tiri.